

Na osnovu člana 160. stav 3., a u vezi sa članom 236. stav 1. alineja 33. Zakona o zdravstvenoj zaštiti ("Službene novine Federacije BiH", broj 46/10), federalni ministar zdravstva donosi

PRAVILNIK

O NAČINU I POSTUPKU ODOBRAVANJA SPECIJALIZACIJA ODNOSNO SUPSPECIJALIZACIJA DRŽAVLJANIMA BOSNE I HERCEGOVINE NA LIČNI ZAHTJEV

Član 1.

Ovim pravilnikom uređuje se način i postupak odobravanja specijalizacija odnosno supspecijalizacija, kao i način polaganja specijalističkog odnosno supspecijalističkog ispita državljanima Bosne i Hercegovine, sa prebivalištem na teritoriji Federacije Bosne i Hercegovine (u daljnjem tekstu: Federacija), na lični zahtjev.

Član 2.

Državljanima Bosne i Hercegovine, sa prebivalištem na teritoriji Federacije, a koji imaju stručno zvanje zdravstvenog radnika sa visokom stručnom spremom, mogu na lični zahtjev zatražiti od Federalnog ministarstva zdravstva (u daljnjem tekstu: Ministarstvo) odobrenje specijalizacije odnosno supspecijalizacije, pri čemu sami snose troškove specijalizantskog odnosno supspecijalizantskog staža, kao i troškove polaganja specijalističkog odnosno supspecijalističkog ispita.

Zdravstveni radnik iz stava 1. ovog člana mora imati završen fakultet zdravstvenog usmjerenja, položen stručni ispit u svom stručnom zvanju, godinu dana radnog staža u struci, poznavanje jednog stranog jezika, te osigurano plaćanje svih troškova specijalizantskog odnosno supspecijalizantskog staža i polaganja specijalističkog odnosno supspecijalističkog ispita u smislu člana 160. stav 2. Zakona o zdravstvenoj zaštiti ("Službene novine Federacije BiH", broj 46/10).

Član 3.

Zahtjev za odobrenje specijalizacije odnosno supspecijalizacije podnosi Ministarstvu zdravstveni radnik koji ispunjava uvjete iz člana 2. ovog pravilnika.

Uz zahtjev iz stava 1. ovog pravilnika podnosi se slijedeća dokumentacija:

- dokaz o ispunjavanju uvjeta državljanstva Bosne i Hercegovine, kao i uvjeta prebivališta u Federaciji,
- diploma o završenom fakultetu zdravstvenog usmjerenja,
- uvjerenje o položenom stručnom ispitu,
- dokaz o godini dana radnog staža u struci,
- potvrda o poznavanju jednog stranog jezika,
- saglasnost zdravstvene ustanove odnosno fakulteta zdravstvenog usmjerenja u kojem će se obaviti specijalistički odnosno supspecijalistički staž, uz naznačenje datuma početka obavljanja specijalističkog odnosno supspecijalističkog staža u toj ustanovi,
- dokaz o osiguranom plaćanju svih troškova specijalizantskog odnosno supspecijalizantskog staža i polaganju specijalističkog odnosno supspecijalističkog ispita,
- dokaz o uplati specijalizacije odnosno supspecijalizacije,
- dokaz o uplati federalne takse.

Član 4.

Iznos troškova za obavljanje specijalizantskog odnosno supspecijalizantskog staža, kao i iznos troškova polaganja specijalističkog odnosno subspecijalističkog ispita, utvrđuje se rješenjima federalnog ministra zdravstva (u daljnjem tekstu: ministar).

Troškove iz stava 1. ovog člana snosi podnosilac zahtjeva za odobrenje specijalizacije odnosno supspecijalizacije iz člana 3. ovog pravilnika, odnosno podnosilac zahtjeva za odobrenje polaganja specijalističkog odnosno subspecijalističkog ispita.

Zdravstvenim ustanovama odnosno fakultetima zdravstvenog usmjerenja u kojim specijalizant obavlja program specijalističkog odnosno subspecijalističkog staža sredstva se doznačuju srazmjerno trajanju specijalističkog odnosno subspecijalističkog staža u tim ustanovama.

Član 5.

Rješenje o odobrenju specijalizacije odnosno supspecijalizacije donosi ministar, u roku od 30 dana od dana podnošenja uredno dokumentiranog zahtjeva iz člana 3. ovog pravilnika.

Rješenje iz stava 1. ovog člana upisuje se u registar odobrenih specijalizacija odnosno supspecijalizacija, a koji vodi Ministarstvo.

Rješenje iz stava 1. ovog člana je konačno u upravnom postupku i protiv istog je moguće izjaviti tužbu nadležnom sudu, saglasno propisima o upravnim sporovima.

Član 6.

Odredbe propisa o specijalizacijama koje se odnose na uvjete za odobravanje specijalizacija odnosno supspecijalizacija, grane specijalizacija odnosno supspecijalizacija, planove i programe specijalizacija odnosno supspecijalizacija, njihovo trajanje, obavljanje specijalističkog odnosno subspecijalističkog staža, kao i način polaganja specijalističkog odnosno subspecijalističkog ispita, shodno se primjenjuju i na državljane Bosne i Hercegovine sa prebivalištem u Federaciji, a koji specijaliziraju na lični zahtjev u smislu člana 2. ovog pravilnika.

Član 7.

Odredbe ovog pravilnika ne odnose se na lica koja su završila fakultet zdravstvenih studija, kao i na lica koja imaju status zdravstvenog saradnika, a što će se urediti posebnim propisom.

Član 8.

Ovaj pravilnik stupa na snagu osmog dana od dana objavljivanja u "Službenim novinama Federacije BiH".

Broj 01-37-5965/10
5. oktobra 2010. godine
Sarajevo

Ministar
Prim. dr. sci. **Safet Omerović**, s. r.